



# خَائِك لوجيستي

الجزء الثاني

## النظارة اللوجيستية

اللوغيسي تي / فيصل عَدَّاس

بِسْمِ اللَّهِ الرَّحْمَنِ الرَّحِيمِ



خليك لوجيستي

ج2

إلبس النظارة اللوجيستية

بقلم

اللوغيسيبي / فيصل عواس

## الفصول

- ❖ مقدمة النظارة اللوجيستي
- ❖ شركات ما كنت تعرف إنها لوجيستي
- ❖ شركات تصنع معدات لوجيستي
- ❖ مشاريع تنتظر ك
- ❖ شركة سبب نجاحها إبداعها اللوجيستي
- ❖ الخاتمة



## الفصل الأول

### مقدمة النظارة اللوجيستية

يعني رجعتلي ثاني. أهلاً و مرحباً بيك. اليوم وبعد ما دخلت من الباب لعالم اللوجيستكس صار وقت تلبس النظارة. الجزء الأول من خليك لوجيستي كان البوابة و إنت عديتها. الآن عشان تتمشى في عالم اللوجيستكس حتلبس نظارة اللوجيستي و حتبدأ تشوف أمور كانت ظاهرة قدامك بس مو واضحة. الآن حتوضح. في هذا الجزء حتمشى معاك في عالم اللوجيستكس و حتشوف شركات و مشاريع و أشخاص لوجيستييين كثير و كمان حناكل و نشرب في مطاعم لوجيستية كثير فجهز نفسك و خليك لابس النظارة. مع كل فصل في تمشايتنا هذه النظارة حتصير جزء منك و حتوصل لمرحة حتصير معاك دايمًا من غير ما تفكر فيها. وقتها حتصير النظارة ملك لك باذن الله. يعني حتاخذها معاك البيت. باذن الله هذه النظارة حتخليك تكشف أي شيء لوجيستي و أي فكرة لوجيستية و أي شخص لوجيستي و أي شركة لوجيستية و أي مشروع لوجيستي و أي مشكلة لوجيستية و أي خدمة لوجيستية. مجرد أنك تطالع فيها حتتكشف قدامك. فحافظ عليها كويس. هذه نظارتك اللوجيستية. اليوم أنت بهذا الكتاب إشتريتها. يا الله خليني ألبسك هِيًا. الله على العالم إِلِي حتشوفه اليوم. وأنا معاك. يا الله بينا على بركة الله.



## الفصل الثاني

# شركات ما كنت تعرف إنها لوجيستية

إيش رأيك لو قلناك إنه في شركات كثير تستخدمها يوميا بس ماكنت تسميها شركات لوجيستية. لأنني مو كل شركة تقدم خدمات لوجيستية لازم تسمي نفسها شركة لوجيستكس! هذا سر جديد لازم تعرفه. إنتا ممكن تأسس شركة تشتغل في مجال معين ولها إسم و اختصاص من غير ما تقول عليها أنها شركة لوجيستكس. الآن لمن حعطيك أمثلة حتفهم قصدي كويس. لأنني زي ماقرأت في الجزء الأول من **خليك لوجيستي**. أي خدمة فيها نقل و تخزين و تخطيط و تنفيذ النقل و التخزين تعتبر خدمات لوجيستية. فيالله تعال معايا وخليك لابس النظارة و شوف شركات إنتا إشتغلت معاها و ممكن كمان تعجبك و نفسك تبني وحدة زيتها في يوم. و شوف كيف إنها أصلا شركة لوجيستكس. وبإذن الله اللي حعطيك هوا في كتب **خليك لوجيستي** حياخليك تقدر تأسس زيتها وأحسن كمان على قدر ماتحب إنتا طبعاً. يالله نشوف كم وحدة من هذه الشركات.

## أمازون

طبعا شركة زي أمازون غنية عن التعريف. هذه الشركة تعتبر من الشركات اللي حفزت العالم كله إنه يغير من طريقة مبيعاته و خلت العالم كله ينظر للتجارة الإلكترونية على أنها أساس لازم يكون موجود في كل بلد وفي كل إقتصاد. طيب إيش

رأيك لو أفلك إنه أمازن هي شركة خدمات لوجيستية. هي شركة لوجيستكس. لو بس فحست الشركة وشفتم خدماتها حتشوف إنه لا يقل عن 95% من أعمالها هي أعمال لوجيستية بحتة. ومو بس أي لوجيستكس. لوجيستكس على مستوى عالي جدا فاقت كثير من مقدمين الخدمات اللوجيستية اللي صرلهم في السوق عشرات السنين قبل أمازون. أمازون حقيقتاً تقدم خدمتين أساسية. وهذه الخدمتين اللي تفوقت فيها أمازون موجودة في التعريف المبسط اللي أعطيتك إياه عن اللوجيستكس. أمازون تقدم خدمة تخزين و توصيل. هذا اختصاصها الرئيسي. تخزين المنتجات و توصيلها. حتى لو سمعت مؤسس أمازون جيف بيزوس لمن يتكلم عن الشركة وكيف بدأها يقولك "أنا بدأتها أأخزن كتب في موقف السيارة اللي في البيت ولمن شخص يطلبها من الموقع أروح على مكتب البريد وأرسله هيا" يعني تخزين و توصيل. الفرق اللي بينه وبين كل الشركات الثانية وقتها إنه عرض المنتجات أونلاين. بس. هذا هو الفرق الوحيد. يعني تقدر تقول إنه 5% من شغله عرض المنتجات أونلاين و 95% تخزينها وتوصيلها. فبالعربي هو عبارة عن شركة لوجيستكس و عنده موقع يعرض فيه منتجات عملائه. لا تنسى إنه لعشرات السنين هو مايملك ولا بضاعة موجودة في الموقع الإلكتروني. هو بس ياخذها من أصحاب البضائع بعدين يخزنها و بعدين يوصلها. يعني زي كل شركات اللوجيستكس الثانية اللي موجودة اليوم. بس الفرق إنه

قال بدل ما أخزن و أشحن بس زي كل شركات اللوجيستكس أنا كمان حساعد أصحاب البضائع على إنهم يبيعوها أونلاين. وهنا طارارت الشركة. نقدر نقول إنه أمازون عبارة عن لوجيستكس + مبيعات اونلاين و اللوجيستكس هو الأساس. اليوم أمازون عندها كل شيء موجود عند أي شركة تقدم خدمات لوجيستكس. عندها مستودعات بمساحات أكبر من أي شركة لوجيستية ثانية و تشحن شحن أضخم جدا و تتعامل مع شركات الطيران و عندها طياراتها الخاصة مو بس حقت صاحب الشركة اللي يروح فيها إجازات و يسافر فيها مع عيلته لا عندهم طيارات شحن للبضائع. و كمان تتعامل مع عشرات الآلاف من السيارات للتوصيل في كل أنحاء العالم. أمازون تعتبر من أنجح إذا مو أنجح شركة لوجيستكس موجودة في العالم الى اليوم. و تقدم خدمات لوجيستية بشكل غيرت فيه ملامح التجارة في العالم. ولو تلاحظ مو لازم يسميها شركة لوجيستكس و يظهر كلمة لوجيستكس في إسم الشركة. بس سماها أمازون. وهي في الحقيقة شركة لوجيستكس. زي فندق الهيلتون مو لازم يقول عن نفسه إنه شركة إعاشة أو شركة سكن مؤقت أو شركة ضيافة. يقول عن نفسه فندق الهيلتون بس في الحقيقة هي شركة تقدم خدمات سكنية و ضيافة. كذلك أمازون هي عبارة عن شركة لوجيستكس ومو بس أي شركة بل شركة قدمت خدمات لوجيستية العالم كله تعلم منها وبيسوي زيها. اليوم شركات كثير زي نون و سوق قبلها و

شركات كثير طلعت هي كلها شركات لوجيستية أضافت لنفسها قوة مبيعات أونلاين و حيطلع كثير منهم كمان. و إنتا كمان ممكن تكون صاحب شركة لوجيستكس تقدم خدمات تخزين و توصيل مربوطة مع خدمة أونلاين في سوق معين تسهل الربط بين البائع و المشتري.

هذه شركة وحدة الآن عرفت أنها لوجيستية. الآن هذا أول استخدام للنظارة. كيف؟ حلوة صح. لسا أصبر شوية وحتبدأ تشوف أي شركة زيها و علطول حتصير تكتشف و تفهم و تعرف انها لوجيستكس. يالله نروح لشركة ثانية.

## أوبر

شركة أوبر ممكن من أكثر الشركات اللي استخدمتها و كمان أوبر مو شركة لوجيستية صعب تكتشفها. هذه شركة لوجيستية 100%. لاحظ إنه هي عبارة عن خدمة نقل أشخاص من مكان لمكان. بكل بساطة هذه خدمة لوجيستية واضحة من غير تحليل زيادة. و أوبر كمان إشرتت شركة كريم اللي إتأسست في منطقتنا. الإثنين يعتبروا أكبر شركتين لوجيستية مختصة في نقل الأفراد. و كمان اليوم اتوسعت لدرجة إنها صارت تنقل و توصل أكل و في بلدان ثانية صارت تنقل حيوانات و توصلك آيسكريم

إذا حابب. يعني باختصار هذه شركة مية في المية لوجيستية و تعتمد على التكنولوجيا بشكل كبير في تقديم خدماتها. و كمان هذه الشركة نقلت عالم الخدمات الإلكترونية لمستوى آخر و حفزت كثير من الناس على تأسيس خدمات زيها. وفي نفس الوقت أعطت الفرصة لأي شخص حابب إنه يشغل سيارته بأنه يكسب من غير ما يتوظف بدوام من تسعة لخمسة. يعني فادت أطراف كثيرة و الأهم إنها فادت المجتمع ككل. أنا شخصيا في أغلب سفراتي أعتمد إعتما كامل في تنقلاتي على أوبر. صار كأني عندي سواق خاص في كل مكان و سيارات في كل مكان. هذه قوة دمج الخدمات اللوجيستية بطريقة الكترونية. وإننا كمان الآن وبعد ماشفت كيف ممكن شركة لوجيستية زي أوبر تقدم خدماتها الآن ممكن تفكر بفكرة تسهل حياة الناس بطريقة لطيفة و إبداعية. وهذه شركة أوبر و كريم اللي ماكنت تسميها لوجيستية الآن وضحت عندك بعد مالبتست النظارة إنها لوجيستية 100%. يالله نروح لشركات ثانية.

## هنجر ستيشن

هنجر ستيشن عبارة عن شركة تأسست في السعودية وعن طريقها تطلب أكل من مطاعم بكل الأشكال و الألوان. بعدين اشترتها شركة ديليفري هيرو الألمانية و أنا بصراحة ما حبيت إنه باع الشركة أصلا بس هذا مو موضوعنا. موضوعنا إنه حتى

لو كانت هنجر ستيشن باينة قدامك على أنها أبليكيشن توصيل طلبات هي في الأساس شركة لوجيستية. واختصاصها اللوجيستي هو توجيه المركبات و التوصيل. زي ماقلتك قبل شوية عشان يكون عندك شركة لوجيستكس مو لازم تسميها شركة لوجيستكس. ممكن تسميها أي إسم أو تعملها أي علامة تجارية. زي هنجر ستيشن وأمازون و أوبر. ماقلوا عن نفسهم أنهم شركة لوجيستية بس حقيقتاً هم شركات 95% من أعمالهم لوجيستية بحتية. لأنني التعامل مع الأفراد والزبائن لازم يكون حماسي و حركي فلانم يكون عندك علامة تجارية تجذب الزبائن و تسهل عليهم إنهم يعرفوك. لو كانت شركتك اللي حتأسسها حتخدم شركات مو أفراد ممكن تسميها شركة لوجيستية. بس لو حتخدم أفراد علطول فالأحسن إنك تعملها بطريقة لها إسم حركي و حماسي وجذاب وواضح وكمال سهل تمييزه عن الشركات الثانية. الأهم في هذا الموضوع إنه حبيت أوضح لك إنه كل تطبيقات توصيل الأكل زي هنجر ستيشن وجاهز و غيرهم كلها في الحقيقة شركات لوجيستية اختصاصها تخطيط و تنفيذ عمليات النقل و التوصيل. و موبس كدا اليوم حتشوفهم بزيدوا من خدماتهم فصار عندهم مستودعات كمان. بس ما يسموها مستودعات عشان الزبائن ما يضيعوا فيسموها سوبرماركت. زي هنجر ستيشن صار عندوا توصيل مقاضي سوبرماركت. كل اللي سواه إنه سوا مستودع صغير ومن هناك بيخزن منتجات حقت شركات ولمن

تطلب من التطبيق يوصلك من هذه المحلات اللي هي في الأصل ممكن تسميها مخازن أو مستودعات. وكمان اليوم صار يوصلك أدوية يعني بيشتغل كأنه صيدلية. بالعربي خدماته اللوجيستية بدأت من المطاعم و راحت للسوبرماركت والآن صيدليات. ويقدروا يزيديا أسواق قد ما يبغوا تعرف ليش؟ لأنني بما أنه أتقن العمليات اللوجيستية حقت التوصيل و التعامل مع السائقين اللي يوصلوا خلاص صار يقدر يوصل أي نوع بضاعة. و هنا تشوف كيف لمن تتقن اللوجيستكس تنفتحك بوابات جديدة كل يوم وتقدر تتوسع قد ما تحب. وهذه حلاوة اللوجيستكس. الآن كل ما حتشوف سيارة أو دباب توصيل صرت تعرف أنه هذه خدمة لوجيستية. فخلينا نروح لنوع شركات ثاني إنت على الأغلب تعرفوا بس ما كنت تسميه لوجيستي. قبل ما نروح ماتلاحظ إنه بعد مالبت نظارة اللوجيستي كل شوية بيان و يوضح لك إنه أغلب الأمور اللي حوليك هي لوجيستية. قلتك اللوجيستكس في كل مكان وأنا بإذن الله حليك تفهمه كويس وفي الآخر تصير لوجيستي محنك. بس خليك معايا إمشي معايا شوية شوية وحتشوف أشياء خرافية. ياالله بينا.

## أمريكان إكسبريس

ممكن تستغرب من هذه الشركة ولكن هل تعرف إنه شركة أمريكان إكسبريس أصلا بدأت كشركة شحن. شركة تقدم خدمات لوجيستية في عام 1850م كان كل شغلها شحن بضائع بعيدين قررت تختص في الفلوس. وأنا ما أشوف إنه هي غيرت إختصاصها اللوجيستي. لأنني أنا دايمًا لابس النظارة اللوجيستية أشوفها إلى اليوم بتقدم خدمات لوجيستية بس بدل ماتكون بتشحن بضائع وبتخزنها صارت بتخزن و تنقل فلوس لعملائها. لأنني تذكر إيش قلتك أول إنه اللوجيستكس مو بس نقل و تخزين أمور محسوسة زي المفروشات و السيارات و الأدوية والأكل. اللوجيستكس كمان يتضمن نقل و تخزين المعلومات وسميها لوجيستكس المعلومات. وأميريكان إكسبريس في نظري إنتقلت من إنها تنقل بضائع حسية إلى نقل فلوس حسية إلين ماوصلت اليوم إنها تنقل فلوس رقمية وعلى شكل معلوماتي. حتى لاحظ إسمها "أمريكان إكسبريس" أو إختصارها "أميكس" زي "فيديكس" وزي "أراميكس" كلها أسماء لشركات شحن مختصة في الشحن الإكسبريس يعني السريع. وهذا يا صديقي العزيز أمريكان إكسبريس شركة لوجيستية بدأت بالشحن و تطورت إلين ما صارت مختصة بالفلوس بس وقدمت خدماتها على أعلى مستوى وبطريقة كروت و صارت

تقريباً رابع أكبر شركة من نوعها في العالم إلى الآن بعد شركة صينية وفيزا وماستركارد. شايف اللوجيستكس كيف في كل مكان حوليك. طيب تعال آخذك رحلة للفضاء وأوريك كم شركة على الأغلب شفتها في الأخبار بس ماكنت تشوفها لوجيستية. خليك لابس النظارة ويالله بينا. "دوبو خطر على بالي وأنا بكتب إنه أسوي بلوزة عليها نظارة زرقا كعلامة للنظارة اللوجيستية او ممكن لون ثاني. الله الله الله شكلها حتكون حلوة. إذا سويتها حطها على الإنستجرام تشوفها وعلى الموقع. قول إن شاء الله. يالله بينا على الفضاء.

### سبيس إكس و بلو أوريجن

هذه شركتين وحدة سواها إيلون مسك صاحب شركة تسلا للسيارات و الثانية سواها جيف بيزوس صاحب أمازون. الإثنين تصنع صواريخ تطلع خارج الغلاف الجوي. طبعا لو ركزت في الشركتين حتشوف وتسمع أشياء كثير بس لو ركزت كويس و شفتها بالنظارة اللوجيستية حتشوف إنها شركات شغلتها نقل و شحن. إي نعم هي عبارة عن شركات زيها زي شركات الطيران و السفن و القطارات و الشاحنات بس الفرق إنها تشحن الى خارج الغلاف الجوي أو ما يسميه الكثير بالفضاء. سبيس إكس شغلتها تنقل حمولات و شحنات لمحطة الفضاء الدولية وفي فيديو سووه كيف حتى

نقلوا سيارة تسلا و رموها في الفضاء تطير. وكان السبب الرئيسي لنجاحها وتميزها هي إنه عملوا صواريخ ممكن يعاد إستعمالها. لأنني قبل كذا كان كل الصواريخ اللي يطلقوها كانت لاستعمال واحد بس. بس هذه الشركتين صواريخها تطلع الفضاء توصل الشحنة وبعدين ترجع تهبط ثاني على الأرض عشان يستخدموها ثاني. والشركتين حتنقل أفراد كمان زي ما شفنا جيف بيزوس وجماعة معاه طلوعوا بصاروخ بلو أوريجن ونزلوا ثاني. فيعني بإختصار هذه شركتين لوجيستيتين شغلتهن نقل الركاب و البضائع لخارج الغلاف الجوي. و في شركة كمان إسمها **فيرجن جالاكتيك** تبغى تختص في السياحة الفضائية واللي أسسها هو مؤسس شركة **فيرجن**. هذه بس تبغى تختص في نقل الركاب. كل هذه شركات لوجيستية وخدماتهم لوجيستية بحتة. وحنشوف تطورات كثير في لوجيستيات الفضاء وهذه معلومة لك الآن عشان تكون هذه الخدمة في رادارك اللوجيستي.

كيف النظارة اللوجيستية معاك؟ بالله عليك مو كل شوية تكتشف إنه العالم اللوجيستي قريب ليك و حوليك. قلتلك أنا حقدملك هذا العالم وأخليك تفهمه كويس بإذن الله و كل ما تستوعبه أكثر كل ما قوتك اللوجيستية حتزيد وقوتك في التنفيذ حتزيد. إنتا خليك معايا وماتشيل هم لأنك حتصير لوجيستي ألف والعالم اللوجيستي حيصير بين إيديك.



## الفصل الثالث

# شركات تصنع معدات لوجيستية

قبل ما أعطيك فكرة عن الشركات اللي تصنع المعدات اللي نستخدمها في عالم اللوجيستكس أولا خليني أذكرك عن معنى المعدات اللوجيستية اللي اختصرناه في الجزء الأول من خليك لوجيستي. طيب أي جهاز أو معدة نستخدمها عشان النقل والتخزين تعتبر معدات لوجستية. الطائرات و البواخر و السيارات و الشاحنات و القطارات و الرافعات بكل أشكالها تعتبر معدات لوجيستية. كثير شركات إنت تتعامل معاها وكثير من الشركات اللي إنت شخصيا تحبها حتشوف إنها في الأصل بتصنع معدات لوجيستية. طبعا الآن و بعد ما إنتا لابس النظارة حتبان عندك و تصير واضحة. طبعا أنا ما حتكلم عن كل الشركات لأنني حنحتاج كتاب كامل لهذا الموضوع بس حعطيك كم شركة من اللي تعتبر مشهورة و إنتا تعرفها كويس و بعدين حتقدر تعرف كل الشركات الباقية لحالك. يالله نبدأ على بركة الله.

### مرسيدس

تعتبر مرسيدس من أوائل الشركات اللي تصنع أحسن و أفضل و أقوى شاحنات النقل في العالم. في السعودية تحديدا مرسيدس تعتبر من أوائل إذا مو أول شركة تخدم السوق بشاحناتها. حتشوف شاحنات مرسيدس حوليك على الأغلب في كل مكان. و

مرسيدس تصنع أكثر من نوع شاحنات تشيل أوزان كبيرة جدا. على الأغلب إنك شتفتها ولا يزال حتشوفها وفي الأيام القريبة الجاية حتشوف شاحنات مرسيدس كهربائية داخله في السوق.

## فولفو

كمان شركة فولفو تعتبر من الشركات الرئيسية في تصنيع شاحنات النقل. ممكن ما تكون بحجم مرسيدس في سوقنا بس تعتبر شاحناتها من أفضل و أقوى الشاحنات في السوق ولو تتذكر دعاية فولفو الشهيرة اللي سواها الممثل فان دام ووقف بين شاحنتين وسوى حركة السبليت الشهيرة و الشاحنتين ماشية. هذه شاحنات فولفو وتعتبر من أفضل الشركات اللي تصنع المعدات اللوجيستية.

## تويوتا

تويوتا طبعا غنية عن التعريف. و تصنع أنواع كثير من الباصات من كل الأحجام. ممكن ما تصنع شاحنات زي مرسيدس و فولفو و مان" هذه شركة قوية جدا في عالم

الشاحنات" بس تويوتا تصنع باصات كثير تستخدم في نقل الركاب و على الأغلب شفتها كثير في الشارع. كمان تويوتا تصنع معدات لوجيستية نستخدمها داخل المستودعات وفي نقل البضائع. هذه المعدات نسميها روافع شوكية. شوفها في جوجل بس إكتب "رافعة شوكية" وحيطلعك أمثلة كثير. الروافع الشوكية أشكال و ألوان كثير. وتويوتا تعتبر من أحسن الشركات اللي تصنعها. وحتى عندهم روافع شوكية من غير سائق. إلكترونية و تسوق نفسها. شوفها اونلاين. خلي يكون عندك فكرة عنها.

### كل شركات السيارات

إيش رأيك لو أقلك إنه كل شركات السيارات من غير أي إستثناء هي عبارة عن شركات تصنيع معدات لوجيستية. سبتلك هذا الموضوع لآخر الفصل. كل السيارات السريعة و الصغيرة والكبيرة كلها حقيقتاً معدات لوجيستية. لأنني إذا تتذكر اللوجيستكس مو بس بضائع. اللوجيستكس كمان نقل الناس. وكل شركات السيارات إختصاصها تنقل الناس من مكان لمكان. وبذلك تصير كل الشركات اللي شايفها و كل السيارات اللي شايفها عبارة عن معدات لوجيستية في الأصل. شايف كيف تقريبا كل

شيء لوجيستكس. قلتك النظارة هذه حتخليك تشوف العالم كله لوجيستكس. لأنه كله أصلا لوجيستكس. إلبس النظارة و حافظ عليها وحتصير لوجيستي محناك بإذن الله.



## الفصل الرابع

### مشاريع تنتظرك

## نيوم

أكيد سمعت عن نيوم زي أكثر العالم اليوم. بس اليوم و بالنظارة اللوجيستية أبغاك تشوف الموضوع من منظور لوجيستي و حتشوف شي خرافي. أولا نيوم عبارة عن مدينة جديدة. يعني مدينة كاملة بتتبني من الصفر. تخيل بس كمية المواد و البضائع اللي لازم تنتقل و تتخزن وتتوصل. من بنية تحتية لمباني لأجهزة ومعدات. كميات ولا ألف شركة تقدر تسويها لحالها. فتخيل كم لوجيستي لازم يدير هذه المواضيع. خذها مني تحتاج كثير لوجيستيين. وفي نيوم في مشروع اسمه هيكساجون اللي عبارة عن مدينة صناعية كاملة على البحر و هذه مئات المصانع الجديدة. يعني لوجيستكس ما يوقف. وفي جزيرة سندالة يعني فنادق و مطاعم و كمان لوجيستكس ما يوقف. و في كمان مشروع تروجينا اللي في الجبال اللي حيكون فيه مساكن و مطاعم و فنادق ومحلات يعني كمان حيحتاج خدمات لوجيستية ما توقف. إنتا ممكن تكون جزء من هذه المشاريع كلوجيستي. ممكن تأسس شركتك عشان تقدم خدمات لوجيستية توفر الاحتياجات اللي ما توقف و ما حتوقف لمدة عشرة سنين جاية. و حتى بعد العشر سنين حيحتاج خدمات لوجيستية عشان تشغل كل هذه الأماكن. و ممكن تختار إنك تكون مدير لوجيستي في وحدة من آلاف الشركات اللي حتشتغل في هذه المشاريع و تكبر

فيها او تتعلم كم سنة فيها بعدين تأسس شركتك على حسب الاحتياجات و النقص في الخدمات اللي حتكتشفه. يعني كمية الفرص للوجيستيين بس في مشاريع نيوم كمية ضخمة جدا و أنا برأيي هذا المشروع لحاله يحتاج آلاف اللوجيستيين عشان يتنفذ في الوقت المطلوب و على أحسن وجه. إنت عليك تختار كيف تبغى تدخل في الموضوع. خلي هذا الموضوع في بالك و كمان حعطيك مشاريع ثانية مليارية كمان فيها فرص لوجيستية ما توقف. ياالله بينا.

### رياض إكسبو

أكيد سمعت برياض إكسبو. هذا مو مشروع بسيط. هذا مشروع ضخم جدا والمتوقع إنه حيضروه أربعين مليون شخص في خلال ستة أشهر. التجهيزات بدأت من اليوم وتخيل بس كيف مدينة وحدة زي الرياض حتستقبل أربعين مليون شخص. كل الأربعين مليون شخص لازم يناموا في فنادق و ياكلوا و يشربوا و ينتقلوا من مكان لمكان جوا المدينة. هذه لحالها فرص عمل مو بس للقطاع اللوجيستي بل لكل القطاعات الموجودة. بس عشان كل القطاعات تشتغل لازم قطاع واحد أساسي يكون جاهز للتنفيذ وإيش هو هذا القطاع؟ الله عليك أكيد على بالك. القطاع اللوجيستي. أتذكر لمن بدأوا تجهيز لإكسبو دبي من سنين سمعت أنه دبي إحتاجت إنها تبني كم ألف فندق. هذه

بس عشان تستوعب الزوار. يعني إختصاص الهوتيل لوجيستيكس طار في السما أيامها. وتماما هذا اللي حيصير في الرياض. آلاف الفنادق الجديدة لازم تتبني ومطاعم وخدمات وطرق ونقل ومولات ومحلات. هذه ملايين الفرص اللوجيستية اللي حتشوفها زي مانقول بالعامية "على قفى من يشيل" يعني بالعربي هذه المشاريع تحتاج لوجيستييين. وأنا اليوم أبغاك تحط هذا الموضوع في بالك. نحتاج لوجيستييين واللي حيصير لوجيستي اليوم كسبان اليوم و بكرأ. جبتلك هيا من بدري وإننا إختار من آلاف الفرص اللوجيستية فين تبغى تبدأ أو فين تبغى تختص. والله يوفقك ويفتح عليك.

## كأس العالم

أكيد سمعت أنه كأس العالم حيصير في السعودية في 2034. هذا يعني في ملاعب حنتبني وكمان مرافق كثيرة لخدمة الجمهور و الحدث بشكل عام. أكيد التجهيزات اللي حتتعامل عشان الإكسبو حتفيد كمان في التجهيز لكأس العالم. زي مثلا الفنادق حتفيد كل المشاريع والمحلات وتطوير المطارات هذه كلها حتفيد كل المشاريع. بس لازم تعرف إنه عالم كرة القدم عالم مختص و لوجيستيكس كرة القدم كمان واحد من الإختصاصات اللوجيستية ويدخل فيها كثير لوجيستيكس الفعاليات. إننا إذا قررت تختص في هذا العالم حتكون من القلائل زي كأنك اختصيت في لوجيستيكس الفورميلا

ون أو لوجيستكس السيارات. وبإذن الله في جزء قادم من خليك لوجيستي حعطيك فيه تفصيل أكثر عن عالم لوجيستكس كرة القدم و لوجيستكس الفعاليات. هنا بس أبغى أعطيك لمحة عن كم مشروع يحتاج خدمات لوجيستية كثيرة ومختصة. وكأس العالم واحد من هذه المشاريع. خليها في بالك ويالله نتكلم عن مشروع ثاني كمان يحتاج لوجيستكس للأبد. إيوة للأبد من غير مبالغة. ياالله بينا.

## الحج والعمرة

آخر الأخبار تبين إننا رايحين على طريق إنه يوصل عدد الحجاج والمعتمرين لمية مليون زائر سنويا. هذه لحالها فنادق وأكل و شرب وحركة وتنقل لمية مليون شخص في مدينتين. مكة و المدينة. أنت ممكن تقرر بس تخدم هذه المدينتين لوجيستيا. وكمان ممكن تخدم تنقل الحجاج من جدة لمكة هذه لحالها لو تشتغل وتطورها لعشرين سنة يادوب تقدر تاخذ شي بسيط من الطلب الهائل الموجود واللي حيزيد. هذه لك عشان تعمل حسابها عندك وممكن تختار إنك تكون لوجيستي مختص في الحج و العمرة.



## الفصل الخامس

# شركة سبب نجاحها إبداعها اللوجيستي

## زارا

زارا تعتبر من أنجح شركات الأزياء في العالم و إيش رأيك لو أفلك إنه خطتها اللوجيستية هي سبب رئيسي في هذا النجاح. زارا عندها طريقة لوجيستية في شحن ونقل وتخزين ملابسها وأغراضها وتوصيلها للمحلات حول العالم وهذه الطريقة خلتها توفر ملايين الملايين من الدولارات وفي نفس الوقت أعطتها الفرصة إنها ترفع إيراداتها وأرباحها. أنا شخصيا درست عن زارا واللوجيستكس حقها من كثر ما إتحمست على الفكرة. حشرحك هيا باختصار وبإذن الله في فقرة لوجيستكس الأزياء في جزء قادم من خليك لوجيستي حتكلم عنها بتفصيل أكثر. أو ممكن كمان أعمل درس وكتاب مفصل بس لهذا الموضوع من كثر ماهو مهم وضروري أي أحد عنده ماركة أزياء أو حابب يدخل هذا العالم إنه يعرفها عشان يقدر يستفيد من خبرتهم ويطبق هذه الطرق اللوجيستية الإبداعية في شغله ويخليه ينجح أكثر وتقل تكاليفه وتزيد أرباحه. باختصار زارا عندهم عشرات إذا مو مئات من المصانع حولين العالم يتعاملوا معاها. تخيل إنهم بيغوا يرسلوا ملابس لمحل زارا اللي في الرياض. تتخيل حيثحنوا جينزات من إندونيسيا للرياض علطول و جاكيتات من مصنع في باكستان للرياض علطول وبعدين محافظ من مصنع في إيطاليا للرياض علطول!! هذه كلها

تكاليف شحن بالقطاعي. بس هما في الحقيقة يرسلوا كل الأشياء لإسبانيا أول. ويجمعوا كل شيء لازم يروح الرياض مع بعض في حاويات شحن بحري وبعدين يرسلوا الحاويات فيها خلطة بضائع مع بعض ضربة وحدة للرياض. هذه طريقتهم. فيصير كل شي جاي من أي مصنع يرسلوه على إسبانيا أول وياخذوا الشحن بسعر الجملة وبعدين كل شي لازم يروح الرياض يرسلوه ضربة وحدة من إسبانيا متجمع مع بعض. وكمان ياخذوا الشحن بسعر أقل لأنه بالجملة من مكان واحد إلى مكان واحد بدل ما تكون من عشرين مكان مختلف للرياض صارت الآن من مكان واحد لمكان واحد. وهذه وحدة من الاستراتيجيات اللوجيستية الرئيسية اللي يستخدموها ووفرتهم ملايين وكلها راحت لتوفير السعر على الزباين وكمان زيادة أرباحهم. هذه مثلا شركة استعملت اللوجيستكس لصالحها وإننا كلوجيستي محترف تعرف كيف تبدع في أي شركة و تعملهم استراتيجيات تخليهم ينجحوا و يوفروا لأنني كل شركة تبغى تكون ناجحة لوجيستياً وكمان توفر التكاليف. ونحن مع بعض حنستكشف كثير طرق ممكن نطبقها إلى إنك تصير خبير في هذه الأمور ووقتها بكل بساطة تقدر تطور عمل أي شركة تديرها. وكمان لا تنسى إنك حتصمم حلول لوجيستية جديدة ما حد سمع عنها من قبل. هذه وقتها كلنا حنكون بنسمع لك و نتعلم منك. ياالله نكمل بالنظارة اللوجيستية

وأعتقد إنك لبستها كويس إلى الآن وعيونك اللوجيستية صارت صاحية وحتكشف أي أمر لوجيستي بسرعة.



## الفصل السادس

### الخاتمة

**"النظارة اللوجيستيية صارت ملك لك"**

الآن صار عندك النظارة اللوجيستية. من اليوم لمن تشوف خدمات لوجيستية تظهر على أي شكل حتعرف تلقطها. هدي الأساسي من هذا الجزء هو إنك تلبس النظارة. كان أقدر أخلي الجزء يتكلم عن شركات تسمى نفسها شركات لوجيستكس. بس هذا ما خليك تلبس النظارة. لأنني حتى من غير النظارة إذا شفت شركة زي أرامكس أو دي إتش إل حتعرف علطول إنها شركة لوجيستكس. لأن هذه الشركات واللي زيها بيقولوا عن نفسها و يفصحوا إنهم شركات لوجيستية. بس أنا في هذا الجزء حببت أعطيك رؤية ثاقبة تقدر تكتشف شركات اللوجيستكس اللي ما تسمى نفسها شركات لوجيستكس. لأنك إذا عرفت تكتشفها وقتها عينك اللوجيستية حتكون قوية جدا وصاحية. عشان كذا هدي من هذا الجزء انه أعطيك النظارة وأخليك تلبسها و تجربها في أكثر من موقف. الآن ما ينخاف عليك في عالم اللوجيستكس. وكمان فائدة ثانية من النظارة إنها حتخليك تكتشف الخدمات اللوجيستية لمن تحتاجها لشغلك مهما كان. إذا حببت إنتا لحالك أو إنتا وأصحابك تسووا أي تجارة أو شغل من أي نوع حتقدروا علطول تعرفوا متى وكيف اللوجيستكس داخل في موضوعكم ووقتها لمن تحتاجوا شي لوجيستي حتعرفوا كيف توصلوا له. وإذا واجهك أي عائق لوجيستي أو مشكلة لوجيستية وما عرفت كيف تحلها فكلم أهل اللوجيستكس أو راسلني. أرسلني على الموقع [Allogisty.com](http://Allogisty.com) أو على إنستجرام @allogisty وأنا حساعدك بإذن الله.

وكمان حعرفك على لوجيستيين يساعودك و يخلصوك موضوعك. وهذا حيكون تركيزي باذن الله في الجزء القادم من خليك لوجيستي. إنتا في الجزء الأول دخلت الباب وفي هذا الجزء لبست النظارة وصرت تشوف اللوجيستكس في أي شي. الآن الجاي هو الدعم اللوجيستي في العلاقات اللوجيستية. زي ما قلتك أنا مهمتي إنه أخليك لوجيستي. وعلاقاتك و معلوماتك اللوجيستية من الأساسيات عشان تصير لوجيستي. الآن استوعب هذه المعلومات اللي وصلتلك اليوم والجاى أكثر و أكبر وحيخليك تطير في عالم اللوجيستكس. الله يفتح عليك في هذا العالم زي ما فتحه علي وأكثر و يبارك لك في حياتك وأعمالك كلها. وخلينا على تواصل لأنى ما أبغى بس نتكلم عن طريق الموقع وإنستجرام. هذول ضروريين عشان الأخبار والتطورات أكيد وعن طريقهم نقدر نضمن إنك بيوصلك كل جديد. أنا أبغى كمان يكون في تواصل شخصي مع بعض و نعرف بعض أكثر لأنى متأكد إننا حنستفيد من كلامنا ونتعلم من بعض لمن كل واحد يشارك خبراته وتطلعاته وأفكاره. أشوفك قريب بإذن الله ودائما تأكد إنك على الطريق إنك تصير لوجيستي. وخلي عندك إيمان زي ما قلت لك أول إنه مافي شي صعب ومعقد إذا شرحناه وبيناه بطريق سليمة و سهلة و إن شاء الله الله حيفتح عليك و يخليك لوجيستي.

في هذا الجزء حنلبس النظارة اللوجيستية. حتصير تشوف عالم اللوجيستكس اللي حوليك في كل مكان. أنت محاط بلوجيستيين و شركات لوجيستكس في كل اتجاه بس عليك إنك تعرفها. بعد ما تقرأ هذا الجزء حتصير تشوفها و تعرفها و حتصير تملك النظارة لوجيستية باذن الله.

تحياتي...

اللوغيسي / فيصل عداس

Instagram: @allogisty

Website: [www.allogisty.com](http://www.allogisty.com)